

20. januar 2016

Inatsisartut suleriaasianni § 37 naapertorlugu matumuuna Naalakkersuisunut imaattunik apeqquteqaatinik saqqummiussivunga:

Apeqqutit:

- 1. Naalakkersuisut arlaatigut qulaajallutik pilersitsisimappat, paasiniallugit qilalukkat qaqortat Tunumiittut Svalbardimut atanersut, taamatullu amerlassusiat naammanersut, Tunumi qilalukkanik qaqortanik piniarnissamik akuersissuteqassagaanni?**
- 2. Taamaangippat: Naalakkersusiut qaqugukkut qulaajaallutik pilersitsiniarpat?**

(Inatsisartuni ilaasortaq, Laura Tàunâjik, Siumut)

Tunngavilersuut:

Qilalukkat qaqortat piffissap ilaatigut Tunumi takussaasarput. Paasinnittaasera malillugu imaassimavoq, najukkami piniartut qilalukkanik qaqortanik piniaqqusaanngitsut. Qilalukkat qaqortat qilalukkallu qernertat illersugaanerat Namminersorlutik Oqartussat Nalunaarutaanni § 2-mi takuneqarsinnaavoq (Nalunaarut nr. 7, martsip 29-ianeersoq 2011) qilalukkat qaqortat eqqissisimitaasut, immikkut pisoqartinnagu, tamannalu nalunaarummi § 4-mi takuneqarsinnaavoq. § 4-mi pisassarititaasunik annertussusiliineq pineqarpoq; Kalaallit Nunatta kitaani taamaallaat pisassiissutit pineqarput Tunu minillugu.

Naalakkersuisut septemberimi 2014-mi, § 37-mik apeqqusiorninni, akissuteqarlutik allapput (189/2014), biolooginngooq Tunumi sulii qilalukkanik qaqortanik pisassiissutinik siunnersuisinnaasimangitsut, Pinnortitaleriffiup paasissutissiissutai naapertorlugit ilimagineqartoq qilalukkat qaqortat Tunumi takussaasartut Svalbardimeersuusimasinnaasut tarfiinnarlutik angalaartut.

Naalakkersuisut nalunaarutigaat, Tunumi qilalukkanut qaqortanut tunngatillugu NAMMCO peqatigalugu immikkut oqaluuserineqarumaartoq.